

TOMAS KARRERA SENIDEAK ELKARTEKO KOORDINATZAILEA

«Bi estatuekin ditugun arazoak berberak izanda, familiartekook bat egin behar dugu»

Senideak eta Gureak elkarteek batzar nazionala izan zuten igandean Donostian.

Urteetako elkarlanean beste urrats bat egin, eta bertatik elkarte nazional bakar gisa atera dira. Halaber, euren helburuak ere zortzi puntuko adierazpen batean bildu dituzte.

GATAZKA

«Gizarteratu behar dugu irtenbidea beharrezkoa dela eta presoek horretan garrantzi handia dutela»



EGUNKARIA

Aitziber Iartza | **DONOSTIA**

Euskal preso eta errefuxiatuen 2.000 senidek txiki utzi zuten Donostiako Kursaleko areto nagusia. Bertan, hainbat gai izan zituen hizpide, eta horiek azaldu dizkigu Tomas Karrerak. ■ **Zergatik erabaki zenuten batzar nazionala orain egitea?**

Orain dela bi urte eztabaida prozesu bat hasi genuen, eta batzar hau izan da horren ondorioak plazaratzeko bidea. Elkarte barruan, benetan garrantzitsua eztabaida prozesua eta hortik ateratako ondorioak izan dira. Hala ere, pentsatzen dugu batzarra ere garrantzitsua izan dela, oso arrakastatsua izan baita eta jende asko etorri baita. Horrek adierazten du jendea pozik geratu dela izandako eztabaidarekin.

■ **Zer ondorio atera dituzue prozesuan eta batzarrean?**

Aurrean erronka handiak ditugula ikusi da, eta martxan jarri behar ditugu. Lehenengo, garbi geratu den gauza izan da elkarte nazionala izan behar dugula;

izan ere, Iparraldean eta Hegoaldean estatuekin ditugun arazoak berberak dira, eta familiartekook ere bat egin behar dugu. Ez soilik asistentzia arloan, baizik eta arlo guztietan.

Bestetik, argi dugu gure senideak gatazkaren adierazle bat direla, eta, hori horrela izanik, guk ere zeregin bat dugu gatazkari begira. Orain arte nahiko jarrrera defentsiboa izan badugu ere, hau da, beti estatuen gehiegikeriak salatzeraz mugatu bagara ere, aurrerantzean pentsatzen dugu badugula legitimatatea gatazka amaitzeko proposamenak egiteko eta elkarguneak planteatzeko.

■ **Hamar urtez bananduta aritu ostean, orain erabaki da elkarte nazional bakar bat osatzea. Zergatik eman da pauso hori orain?**

Ikusi da bat egin behar dugula gure lan asistentzialak hala eskatzen duelako eta barruko aldarrikapenak berak direlako; gainera, gure senideen helburuak nazionalak izanda, senideak bi elkartetan egoteak ez zuen zentzurik. Azkenik, azpimarratu

EGINBEHARRA

«Estatuen gehiegikeriak salatzeraz mugatu izan gara, baina gatazka amaitzeko proposamenak ere egingo ditu orain»

behar da nazioartean ere kontraesana zela bi elkarte egotea, Euskal Herria bat izanda.

Denbora asko generaman lana elkarrekin egiten, eta, beraz, ez da hausturarik izango. Prozesu bat izan da, eta ikusi dugu batasuna askoz ere eraginkorragoa dela.

■ **Nazioartetik hainbat ordezkari etorri dira batzarre-ra. Zer ikasi duzue nazioarteko esperientzietatik?**

Askok ikasi dugu. Batetik, sufimendua bera dela leku guztietan, eta, bestetik, estatuen mekanismoak oso berdintsuak direla.

Hainbat gatazkatako taldeak gonbidatu nahi izan ditugu. Zoritxarrez, Palestinatik ezin

izan da inor etorri, Israelek mugak itxi dituelako, eta Saharatik ere ez, euren jai nagusia orain delako. Aldiz, hemen izan dira beste ordezkari batzuk. Hala, bi paradigma erabat ezberdin izan ditugu. Batetik, Kurdistangoak hemen izan dira, eta hor ikusten da Turkiak gerra eta gatazka luzatzeko estrategia aukeratu duela eta herri kurdia erresistentzia fase batean dagoela. Bestetik, irlandarren kasua oso ezberdina da. Ikusi dugu presoen eta familiartekoen eginbeharra bake prozesuan zein garrantzitsua izan den. Ingalaterrako Gobernuak egin zuen lehen gauza presoak Irlandara eramatea izan zen, eta horrekin konfiantza sortu zen, eta horren ondorekin beste urrats batzuk etorri dira. Han, presoen taldea beste agente politiko bat bezala onartu dute, eta hori oso garrantzitsua da. Hemen gure egoera oso ezberdina da, baina familiartekoen gogoeta oso garbia izan da alde horretatik: ahalegin guztiak egingo ditugu Irlandako kasua hemen ere gerta dadin; badaki-

OINARRIAK**Elkarte berriaren aldarrikapenak**

- 1** Gatazka politikoa dela onartzea.
- 2** Gure senide errepresaliatuen izaera politikoa onartzea.
- 3** Gatazka areagotu eta tenkatzen duten zapalkuntza neurriak amaitzea.
- 4** Errepresaliatuen giza eskubide eta eskubideak aintzat hartzea.
- 5** Euskal preso politiko guztiak Euskal Herrian berehala batzea, eta euskal herritar guztiei Euskal Herrian libre bizitzeko eskubidea onartzea.
- 6** Gatazka bide politiko eta demokratikoen eta elkarbizitzaren bidez konpontzea, euskal herritar guztiok gure etorkizuna erabaki ahal izatea, eta horren inguruan hartzen dugun erabakia onartzea.
- 7** Aukera guztiak eta euskal eragile politiko eta sozial guztiak aintzakotzat hartzea, egungo egoerari elkarbizkitan oinarritutako irtenbidea emateko.
- 8** Irtenbide demokratiko horren alde mobilizatu eta presioa egiteko konpromisoa hartzea.

gu ez dagoela gure esku, baina konponbide baten alde lan egingo dugu. Hala ere, hori gertatzen ez bada, prest egon behar dugu borrokan jarraitzeko eta gure duintasuna gorde eta familiartekook babesteko.

■ **Zer lehentasun ikusten duzue orain?**

Baditugu oinarri batzuk, eta horiek martxan jartzea da erronka. Gaia gizarteratu egin behar dugu, eta ikusi behar da irtenbidea beharrezkoa dela eta presoek garrantzi handia duela horretan. Hala, lehen urratsa haiek Euskal Herriratzea da. Hitzak merkeak dira, eta aldarrikapenak gauzatu egin behar ditugu.